

Hoh Gyoengq Nuengx Iq Ndwen- cieng Angqyangz Vuenyungz!

Ndwencieng

春节



Ndwencieng dwg ngoenzciet conzdungj Cunghvaz minzcuz raeuz, baez daengz ciengz, bi he youh gvaqbae lo, bi moq youh daeujdaengz lo. Baez daengz cieng, ranz ranz cungj nauhyied dangqmaz. Doengzseiz, ndwencieng hix miz haujlai hozdung gig mizyinx.

Daengz cieng miz gienh saeh he moix boux cungj aeu guh, couh dwg cuengq bauqva. Haemhndaep faen cung ceiq doeksat, ranzranz cungj cuengq bauqva bongh hwnj mbwn hwnj fwj bae, sing bauq yiengj dwk rwz cungj yaek nuk bae. Bauqva youq gwnzmbwn dek hai youh ang youh lwenq, lumjbaenz vad fwngz coh gou hemq ndei. Gyoengq nyez iq dawz gij diuzbauqva vad bae vad dauq veh ok gij doz gyaundeiz, guhcaemz guh 'angq angqhoh bi moq daeujdaengz.

Haemhndaep, daengx ranz vunz caez naengh aen congz he, doq yawj cunhceiz lenzvanh vanjvei doq lwnhgoj, caezgya angqfwdfwd. Gyoengq lwgnyez saetsaet diuqdiuq buet daengz dangqnaj vunzhung goenggingq dwk naeuz: "Goengheij fatcaiz, aeu leixseih daeuj." Dangyienz gyoengq vunzhung caeux couh bwh ndei leixseih lo, gyoengqde fat leixseih hawj lwgnyez, hoh lwgnyez daengx bi bingzan ndangcangq.

Cieng coit banhaet, haujlai vunz caeux-caeux couh hwnq lo, cawx huqlaex bae ranz caencik baengzyoux cunz ranz. Deng lo, gyoengq lwgnyez hix ceiq gyaenz cunz ranz, aenvih, gyoengqde youh ndaej sou leixseih lo. Gak gya gak hoh doxcunz baiqcieng, ndaej demlaeg

gamjceingz, hix ndaej sou aeu gij hohfuk ndei, sawj mwngz bi moq seizheiq ndei.

Ndwencieng dwg aen ciet geqlaux he, sawj daengx ranz vunz ndaej doxcomz. Engq dwg bi moq hainduj, dwg naed lwggaet he, naed lwggaet neix couh dwg vaiqvued caeuq vuenyungz.

(Yauz Yizdingz)

Ndwencieng Nauhyied

热闹的春节



Moix bi ndwencieng coit, gingciengz cungj dwg youq laebcin gonqlaeng, ndigah, gyoengqvunz heuh ngoenz neix guh ndwencieng. Daengz cieng le, couh dwg gangj seizcin yaek daengz lo, youh baenz doek ceh doek gyaj lo, dou youh maj hung bi he lo, ndaw biengz doenghgo doenghduz cungj ndiusingj lo.

Daengz cieng le, gya' gya hohhoh bakdou cungj nem fouqdoi, venj daengloengz, nem cih "fuk". Miz vunz youq gwnz ciengz nem nienzveh; boux fwngzriengj aeu geuz raed va nem conghcueng..... Daengz cieng le, gya' gya hohhoh cungj cuengq bauq, bingbing bangbang yiengj mbouj dingz, gyoengq vunz soengq gaeuq coux moq..... Cienznaeuz, "cieng" doiq vunz gig mbouj gitleih, "cieng" baez daeuj faex couh mbaw loenq, nywj roz daimued; "cieng" baez gvaqbae doenghgo doenghduz youh maj hoenghfwdfwd, va hai rim biengz. Baenzlawz gyaep "cieng" deuz ne? Baenzlawz cij naengz hawj vunz gvaq ndaej vaiqvued miz gwn miz

daenj ne? Gyoengq vunz couh cuengq bauq gyaep "cieng" deuz, aenvih "cieng" lau hoengz, caezgya couh nem doiq venj daengloengz, yienghneix gyoengq vunz couh ndaej gvaq saedceij vuenyungz lo.

Ndwencieng daengz lo, neix dwg ngoenzndei cietndei, engq dwg ngoenz vunzcaen doxcomz. Vunz baekfueng gwn gyaujswj, vunz namzfueng gwn faengx gwn nienzgau, caezgya cungj angq dangqmaz. Ndwencieng daengz le, bouxlaux lwgnyez cungj daenj buhmoq, bouxlaux aeu hawj leixseih hawj lwgnyez. Daengz cieng lo, gya' gya hohhoh cungj cawx haujlai doxgaiq gvaq cieng, cungj angqyangz neix, mboujdan dwg ndaw ranz angq, daengx gai daengx mbanj cungj angqfwdfwd, gyoengqvunz miz di foux saeceij, miz di cuengq bauq, miz di ciengqgo diuqfoux.....

Lagh da yawj bae, ndaw singz lajmbanj, nauhyied dangqmaz! Daengz cieng lo, bi moq youh yaek hainduj lo.

(Lungz Cunh)